

四庫全書

集部

欽定四庫全書

可齋雜藁卷五

宋 李曾伯 撰

啟

賀太傅鄭右相

明廷播告元老奮庸立傅惟其人用聿昭于舊德作相
置諸右伴兼總于中樞以道亨世運之屯于易得君子
之復八紘豫動九鼎安疆惟前代訓迪厥官亦舊人圖
任共政當景祐際則有若沂公在隆興朝則有若岐國

雖皆因于首鉉旋晉陟于中台光于前聞未若今日密
勿君臣之好雍容師保之間恭惟某官公溥而明通德
盛而仁熟求多聞典于學甘盤之于殷邦持衆美効之
君元齡之起秦府學力定而誠心貫金石世故熟而先
見猶著龜佐昔端平為小元祐衆正有彙升之喜皇穹
開將泰之機一時規模三代氣象正爾幹斗樞而在手
倏焉付雲岫之無心若早作霖天子形之夢想如農望
歲國人喜其來歸自解瑟而更張久覆甌而有待不扶

其顛危將焉用彼今欲其平治舍我其誰一月三至經
筵雖已罄謀猷而告后十年再登相位何如陳德義以
佐王縉衣斯美于武公黼冕戴加于十會雷霆久蟄宇
宙更春第上心方望于太平而國事愈殷于疇昔境日
蹙而狄難孔棘士風靡而黨論尚騰漢幣壞矣無子母
相權之宜唐筭壅矣之淵泉流通之術哀鴻愁嘆封豕
縱橫挽回陽九之艱難舉看台三之運掉真儒無敵吾
屬何憂猶醫用藥審已試之方如奕舉棋回屢更之局

自是寄安危於八柱平輕重於一舟以弼丕基以熙庶
績畢天下之能事集古人之大成罔俾周召專美有姬
當與文富齋芳我宋器非舊人惟求舊式副具瞻周有
終相亦惟終其永無數某自憐頑鑿久出洪爐雖猷畝
若將終身未忘發緯如鈞陶之轉一氣忽聽制麻駑駘
惟戀主之懷小草有逢時之幸魚鰕侶迹燕雀馳誠望
太階兩兩之符固煙霄之絕想賴廈屋渠渠之庇知風
雨之無虞

賀鄭左相除太師魏國公

辭免
太師

制麻誕播魁柄載持不必備官惟其人謙處維垣之貴
爰立作相置諸左晉封大國之榮九鼎尊安八埏閭懌
睠本朝之上宰圖共政以舊人命潞國于至和之二年
則乃首台之重陟復岐公于隆興之初禊亦由次輔以
後升大冊聳聞前修不邁恭惟某官器閎而用博誠立
而明通有王佐才務引其君子當道曰大人者將以先
知而覺民公論恃之以統盟善類倚之為宗主自還公

袞叶輔宸旒持勁節之水霜締隆知于金石慨念治功
之遼邈圖回世運之艱屯酬酢幾微堅凝力量統百官
而撫夷夏遂萬物以理陰陽咨爾股肱比三年而為國
隆吾體貌成一德以享心上方待之以不名公愈退然
而毋伐茲頌九命式副羣情然且陳善責難俯陋姚崇
十事之說辭榮就列遠愈鄧彪三遜之高對揚帝訓之
丁寧密勿阿衡之倚賴冠榮樞斗衍賦公主蓋將畢大
儒熙載之工了以副明主仰成之意第惟事會尚費謨

猷治善化更雖類解以方調之瑟師老財匱殆如張而
未弛之弓抑猷闕尺脉之證深未易方七劑之效速旁
觀泛論雖非賈誼陸贄以能言畢志盡忠孰識如晦元
齡之不易竊窺倖奏敬嘆盛心譬彼中流駕萬斛之航
而必屆戛乎行道審六馬之馭以何難天其開治平之
期時則賴扶持之力器舊人求舊無疆惟休德新日又
新永膺多福某窮閭屏跡大廈圓身夙蒙化治之生成
今覩明倫而鼓舞譴名未洗豈敢希人才冊子之收慶

頌喧傳猶願效儒士歌詩之作

賀鄭丞相克復襄樊

郡國披圖贊九重之英斷巖廊授策還三峴之舊疆喜
動河山慶闕社稷眷昔光堯之南渡首巖襄漢之西門
艱難經理雖賴臣飛維持主張實繇相鼎曾謂金湯之
全勢洵惟榛莽者歷年幸明良之相逢運神武于不殺
遂收舊物允邁前修恭惟某官膺狄壯猷卻萊儒效身
任國家之泰道亨天地之屯撫御時機運掌中之造化

圖回區宇起心上之經綸謀謨密契于宸衷科瑣曲詳
于邊吏自許以中立將成李愬之功無愧乎弱翁每是
營平之策此三軍之奮勇爰一舉以酬勛城郭皆是人
民則非無復形于浩歎廟貌不移鐘簴如故茲可冀於
中興某猥備馳驅幸附鱗翼不揣敢輕于斯動自知獨
犯于衆難復古銅鞮賴公玉斧敢不增碑浚隍以固吾
圉繕兵積粟以伐敵謀曹翰孰可繼之願重幽燕之守
張仲侯誰在矣庶臻江漢之成

賀別參政

渙恩丹扈復位黃扉九重回日月之明載新大政四海
切雲霓之望爰起舊勛世運亨屯人情悅豫竊以國朝
之大拜每由政府以平躋潞公相于慶曆際之八年先
踰年而進任文簡擢于景德初之七月後闕月以登庸
曾不踰時付之大柄茲誕敷于明制將丕邁于前聞恭
惟某官享帝精忠救時才略琦有竒骨聲氣晏若而下
自安沉真貴人風範凝然為上所重早歷藩方之委寄

屢騰王室之勲庸德望著于朝廷威名在于夷狄昨陪
宰席妙東宸旒下斧鉞于青宜猶以門戶藩籬之倚重
樂鼓鐘于綠野孰知江湖廊廟之同憂若大旱用汝作
霖凡國人望公如歲天其欲治舍孟子當其誰哉吾乃
今知曰周禮盡在是矣用歸赤舄爰整青氈眷帝心渴
見之頻年而時事轉艱于疇昔賈生所謂公私哀痛之
日孔明所謂疲弊危急之秋地既赤而益以重離鴻之
哀磬野雖青而不能弭封豕之游食人材扭于朋黨議

論勝于事功漢弊壞矣無子母相權之方唐策壅矣乏
淵泉流通之術凡此更醫之屢試居然當局之愈難將
以挽回陽九之危孰不徯望台三之出克艱厥臣乃又
允賴和衷爰立作相輔台倚需置左某魚鰕侶迹燕雀
傾心顧雖陷北部之黨人何幸覩東山之相業備王導
百六椽之舊諒尚軫于履箠置江淹四十人之間猶有
希于埏埴

賀王參政

擢自本兵晉陞次輔聞樂正子為政豈惟慰善類之心
見王茂洪何憂足以壯中國之勢幸新鼎象允協巖瞻
仰惟皇朝稽諸唐制下丞相之一等參天子之萬機自
乾德初命居正而副普暨至道際待寇準以同端凡而
政本之與聞茲實鈞衡之俟用除書誕播盛典親逢恭
惟某官學者宗工國之元氣中流砥柱力回瀾倒之百
川繁星麗空人仰芒寒之五緯根源道德運量精神調
瑟問寬猛之絃審局面安危之著凡幾疏之奏鬚髮盡

白歷兩地而上悃愾愈丹以真實之意答天心用和平
之方壽國脉扶持公是主君子之夏盟翊贊神謨銷外
邪之客氣世萬賴之底治上爰仰以責成開天章閣以
疇咨復見仲淹于今日坐退思巖而自任肯若宗道之
下風弘濟興功不邁前哲克艱厥臣乃又允賴和衷爰
立作相輔台倚需置左某猥安野處欣聽郵傳昔從鞭
策之下塵已識廟堂之偉器望泰階六符之采但知拭
目于太平持南豐一瓣之香惟有傾心于宏覆

賀吳僉書

升華書殿晉位樞庭賚良弼其代子言甫新王度有常德以立武事爰贊廟謨天相斯文國有元氣竊者昭陵之盛際每推宥府之得人命范暨韓士夫喜而酌酒以弼副衍儒者為之獻歌用能寬西北之顧憂措中外于寧謐茲時並拜再見前修恭惟某官第一流英賢五百歲間氣自晁董公孫之對人已知為經濟之才在臯朔吾邱之間上允待以弼諧之寄根源世德土苴民庸以

渙乎風水之文豈屯此雲雷之澤狂瀾砥柱野渡橫舟
士每以深源之出處卜安危公不以子文之仕已形喜
愠股肱寄重喉舌歸班日月論思載視禁扉之草風夜
宥密遂聯公府之槐益當邊柝之風寒尚軫宸旒之盱
食彼後將軍十二使將施行之非小老子百萬兵孰主
張是斯至兩地已遲十年子房用而漢業興司馬相則
遼人戒利害在俯仰請借前箸籌之道德成安彊則可
高枕卧矣佇登道揆宏濟興功某素辱殊知欣聆異用

何幸見東山之相業祗憐在北部之黨人跡侶魚鰕心
陪燕雀昔吳公治河南而嘗薦豈敢弭忘今李唐老霸
陵以何為所祈加庇

賀王僉書

渙敷明制晉興本兵受嘉師監祥刑久登喉舌有常德
立武事爰陟股肱九鼎尊安八紘闡澤在昔昭陵之盛
際豈無疆圉之外虞若稽儒英副乃兵柄富文忠用而
弭契丹之犯塞韓魏公進而致元昊之請盟當時士夫

之間共為社稷之慶或酌酒交賀或濃墨獻歌我思古人復見今日恭惟某官棟梁偉器韶濩遺音正色立朝簡靖得重臣體據經引古傳治為世儒宗去來富貴之雲浮出處聲名之山重孤忠霜雪闊步星辰曳尚書之履以來歸前天子之席而渴見朝夕獻納修秋典以明刑日月就將啟辰猷而輔德屬當邊柝軫慮中宸踰春水之已生尚南風之不競人知小范老子胸次萬兵上謂司馬端明脚跟一實藉精神之聚會成道德之安彊

於以轉旋世運之屯扶持君子之泰以回國勢以折寇
衝天欲治今世舍我其誰帝賚予良弼爰立作相某夙
登墻仞欣聽郵傳雖其在北部之黨人何幸覩東山之
相業魚鰕侶迹燕雀傾心問李廣於霸陵今其老矣見
王導於江左夫何憂哉

賀應同知

渙敷顯冊晉典本兵賚良弼代子言甫新王度有常德
立武事爰贊廟謨相業聿開師言允穆觀昭陵之盛際

值疆圉之外虞數求耆英俾副樞柄富文忠用而弭契
丹之犯塞韓魏國進而致元昊之請盟若時搢紳之間
同然宗社之慶或酌酒相賀或濃墨獻歌緬思古人復
見今日恭惟某官宏深而肅括簡重而裕和為世儒宗
獨振斯文于千古負公輔望已遲兩地之十年外夷傳
誦其詞章多士想聞其風采自更政瑟首聘賢旌起霖
雨之蟄龍儀雲霄之祥鳳朝夕獻納備殫告后之猷日
月就将允藉敬王之學洪筆兼唐之兩制皇文作宋之

一經煥然討論潤色之工隱若輔相弼諧之益屬巖邊
瑣爰藉帷籌少出百萬兵甲于胷中足制十二便宜于
圖上精神聚會道德安彊上曰朕太平必斯人久聞心
屬敵謂相中國毋生事當見膽寒既無競以訓四方即
奮勇而宅百揆某幸依牆仞喜聽廷揚魚鰕之侶江湖
亦與乾坤之生育燕雀之賀厦屋冀無風雨之漂搖

賀史同知

渙膺明制晉貳本兵日月論思久為天之喉舌夙夜宥

密爰作帝之股肱宗社安彊華厦闔懌竊考昭陵之盛
治每推右府之得人命范暨韓士夫喜而酌酒以弼副
行儒者為之獻歌用能消西北二寇之憑陵致中外百
年之寧謐於皇親擢再見前修恭惟某官識洞萬微才
兼數器親承文獻邁呂氏之兩申自致勲勞偉徂徠之
一高素熟開濟治朝之籌略飽諳中興故府之典章備
歷外庸益隆上眷密勿丹墀之步武維持黃閣之紀綱
調瑟間小大之絃事事畢舉審局面安危之勢着着皆

高方將綜會計銀于元和況值上屯田圖于神爵以嚴
科項以佐之興登之二三執政之聯賴爾百萬甲兵之
助我先后綏乃祖乃父式副疇庸其永世惟一德一心
庶臻底績克趾累朝之弼亮用基四海之昇平吾不如
蕭何不如子房允資人傑時有若巫賢有若伊陟佇相
王家某投老餘生受知再世雖以杜門而屏迹不勝賀
厦之傾心望泰階六符之躔恨阻瞻于公衮持南豐一
瓣之敬尚希芘于化鈞

賀應同知兼參政

渙被贊書晉陞次輔上開天章閣方將責任于希文公
坐退思熾奚止比蹤于宗道聿新鼎象允協輿情恭惟
某官社稷股肱道學元氣據經引古博洽為世儒宗正
色立朝靖重得大臣體協調政瑟妙東宸旒從容禁橐
之論思密勿細糴之講誦彌綸兩制一新建武之詔書
領袖諸賢盡取正元之朝士以此巖瞻之共屬必知柄
用之有期命子房以運籌足以褫外夷之魄用樂正以

為政斯其慰善類之心自茲贊襄一二日之機予以扶
植億萬年之命以持國是以濟興功作宰相須讀書若
祖有訓戒遼人毋生事彼敵何憂我儀山甫以圖之今
舍孟軻其誰者大鈞播物寰宇皆春某素辱殊知欣聞
異數雖以杜門而屏跡不勝賀履之傾心望泰階六符
之躔恨阻瞻于公袞持南豐一瓣之敬願希芘于化鈞

賀吏部趙尚書

誕敷上旨正陟中臺典三禮作秩宗任均隆于常伯統

百官掌邦治位尤重于家鄉正人得時薄海蒙福恭惟
某官明堂柱石清廟鼎彝河間之所好惟書外無他嗜
沛獻之尤窮于易深造其微由管鑰于龍蟠爰荷囊於
豹尾力辭夕拜恬處春官甄拔人才嘗試山公之啟憂
勤宗社備殫劉向之忠鑒裁歸水鏡之公誦讀重金華
之倚尚書為天喉舌式副具瞻執政猶吾股肱立躋近
輔某迹縻遠嶠比竊崇墻跼跼墮鷲徒羨磔霄之翔翥
渠渠賀燕冀無風雨之震凌

賀禮部徐尚書

疏恩宸宸正位春官司馬統六師方用真儒之武秩宗
典三禮聿新昭代之文帝眷郅隆師言咸穆恭惟某官
吾道元氣公論主盟機軸一家之言典刑丞弼根源六
藝之學師友聖賢自正色之立朝罄精忠而報國賜履
投鉞幾半天下封囊荷橐不愧古人細檀尚論于唐虞
直筆濃重于班馬聿資砥柱以障狂瀾晉司臺閣之大
儀益聳巖廊之顧望尚書為天喉舌式副具瞻執政猶

吾股肱立躋近輔某迹廢遠嶠此竊崇墻萬里梅花共
後早調于商鼎十年棠蔭尚知不廢于蕭規

賀董侍郎權給事

彤墀錫寵青瑣陞華位重論思甫進夏卿之亞任專封
駁仍兼夕拜之榮正人得時薄海蒙福恭惟某官氣融
光嶽道續濂伊武侯五月渡瀘南方已聞于底定周公
三年歸洛東山何可以久留起熊旂犀甲之元戎還豹
尾雞翹之法從竊小百工之事載參九伐之謀惟精神

心術動悟于上前宜風采言論聲聞于天下綸除沓至
柄用可覘批尾抗顏允賴回天之力竿頭進步便當秉
國之均某竦聽好奇驩填衷臆梅花寄遠惟祈商鼎之
早調棠蔭瞻前知守蕭規而弗墜

賀陳中書禮侍

承恩宸陞進貳頌臺蘭省典封應列星于天上徽垣傑
直現一佛于人間輔國本以尊安昭聖心之簡注恭惟
某官金鏗逸韻玉立清標相如之賦得同時久聞于上

仲舒之文宜為誥獨步無前自依日月之光即峻雲霄
之步勾稽胄監丞佐帝宗屬資天下之端人贊決朝廷
之大計咨衷而典朕禮爰藉討論賚說以代予言併煩
潤色以綸除之沓至知柄用之可占維時保護之功羽
翼成矣不日奮庸之命股肱喜哉某縻迹嶺隅馳心墻
仞墮鳶跼跼萬山遠隔于煙霄賀燕渠渠大厦不憂于
風雨

賀吏部倪侍郎

渙膺帝制晉貳天官位外府之上卿久贊鈞陶之化作
中臺之小宰載司衡鑑之公君子得輿善類舉笏恭惟
某官英韶雅韻嵩華清標名姓御屏屢奏毫符之最典
刑家笏熟諳臺閣之儀載依日月之光益峻星辰之武
二省政事之自出科正是資三銓人物之攸司鑒裁久
屬喜哉勅命必也正名一新金鏡之掄才仍輔玉衡之
齊政前裴後李豈專美于唐朝左臯右夔行亮工于帝
室某墮身遠嶠舞手好音對雁飛不到之天烟霄殊絕

依燕賀有成之地風雨奚憂

賀吏部袁侍郎

渙號大廷升華小宰螭坳載筆獨優二史之才豹尾聯
班爰典三銓之寄聿昭帝眷允副輿瞻恭惟某官瑞世
鳳麟識時著蔡考師友一家之譜丕邁前聞績聖賢千
古之燈以詔後學早結楓宸之眷倚久登荷橐之論思
賴時端人定國大計赤墀記事肆煩君舉之書朱邸談
經備罄師資之訓茲人物盡歸于水鏡在上心實屬于

金甌漢宮羽翼之成正資保護虞廷股肱之作佇陟贊
襄某迹繫嶺阪心依墻仞墮鳶跼跼萬山遠隔于烟霄
賀燕渠渠大廈不憂于風雨

賀刑部趙侍郎

渙恩宸陞晉貳秋臺執丹筆以平反晉司憲典佩紫囊
而獻納聿正從班端人得時薄海蒙福恭惟某官英才
寡二大雅不羣天子知向之精忠足補當世朝廷有免
之鯁亮可表宗臣比由東諸侯以來歸即以小司寇而

入侍謂獄者民之命允資忠信慈惠之師而君子法之
源尤軫哀矜惻怛之意康哉勅命必也正名呂侯惟哲
人既灼四方而教德舉陶弼子治更凝庶績以亮工某
縻迹嶺陬馳心墻仞墮鳶跼跼萬山遠隔于煙霄賀燕
渠渠大廈不憂于風雨

賀陸常卿兼修注

擢由內相陟乃上卿議主曲臺任稽古禮文之事書嚴
直筆為御朝言動之司不顯龍光以華鴻碩恭惟某官

學航聖瀆材棟詞林祥麟威鳳之在庭藹然人瑞拱璧
天球之照几展也儒珍條冰清瑩于笋班羣玉久儀于
蓬省以旃厦則得講師之三昧以蘭臺則備書法之五
難將俾立螭日近八磚之影肆煩司蕝風生九棘之華
上心愈切于倚毗國典聿資于潤色起居名為史將垂
法于後來太常不是御竚躋班于邇列某縻身闡寄洗
耳郵傳瞻紫宸香案之前欣欣厦賀憐玉闕樂府之嘆
望望鄉情

賀饒左司

演綸西掖振領中臺郎官上應列星久資贊化都司學
為宰相爰俾正名帝眷郅隆師言允穆恭惟某官珩璜
粹德韶濩正音事熟理明氣挹風霜之久量宏識遠襟
存湖海之寬自步武于周行早塞華于漢省樞機輔贊
粵由佐鼎以調梅事物剝裁幾若迎刃而破竹宜膺妙
東載錫真除臺轄二十四司暫煩綱紀屬車八十一乘
更藉論思某遠在嶺陬阻趨墻仞燕雀賀厦莫無風雨

之虞鶴鷺充庭徒作雲霄之夢

賀右司汪祕丞

肆疇儒望榮陟宰司祕書堪為丞爰畀清華之任都曹
學為相仍資毗佐之功除目翁傳師言允穆恭惟某官
周爨古範荆璞希珍曳組羣工之間芒寒色正振衣千
仞之表實茂聲蜚締異眷于九重贊宏謨于兩地掌丞
轄十二司之事既所優為任冊府第一人之官宜其妙
選班筭浸高于步武鼎梅允叶于調晷登道家蓬萊之

山風塵賈絕厯台斗璣衡之位日月可期某遠在嶺陬
阻趨墻仞燕雀賀厦冀寬凌震之虞鴛鴦充庭知慶亨
嘉之會

賀陳都丞

顯膺睿眷峻陟隆名堯閣通班光中興之籌略漢帷導
旨壯外治之精神溫綈一傳輿情四洽恭惟某官周爰
古範荆璞希珍曳組羣工之間如玉斯治振衣千仞之
表不雷以同茂著清規洵儀華貫夙夜宥密之命允賴

彌縫日月獻納之猷將資啟沃茲陞華于東壁仍佐畫
于西樞柳渾知萬里情折衝餘事元凱有五經庫應變
奚難陸續綸除權輿枋用某猥縻藩閫阻造賓閣方君
子之得時云胡不喜為朝家而致賀遑及其私

賀陳檢詳除戎少監

渙奉宸綸晉登戎監樞機列屬久毗經武之謀蘭錡陞
華爰領訓工之寄有隆異眷益宅英猷恭惟某官韶濩
正音珩璜粹德理明識定竹迎刃以不留局熟機圓珠

走盤而莫喻凡今日運竒于掌上皆曩時親得于目中
以柳渾識萬里之戎情皎然餘略如元凱擅五經之武
庫皆所優為宜被宸知益隆班望函人矢人之事咸精
其能天官地官之遷各率其屬某遠縻藩服阻造賓閔
方君子得時自可折衝于異域幸故人加念毋令投老
于炎陬

賀盛編修

疇庸外府佐畫中樞財貨出納之司既煩贊貳基命宥

密之地爰藉編摩溫綉一傳輿情交慶恭惟某官珩璜粹德韶濩正音曳組羣工之間芒寒色正振衣千仞之表實茂聲蜚早締眷于龍宸已徧儀于鵷序典匭廣言路無幽枉之不通以貢致邦財每受藏之惟謹念邊防之重事伏樞筦之東僚書成賜經武之名暫勤剗潤地峻列洪文之館即喜登庸某遠聽除音倍增慶臆折衝千里知強本之有人托芘萬間爰抒毫而奏記

賀柱侍郎除四川制置

丹絳疏恩碧油分閫登庸荷橐輟楚封鎖鑰之權候對
松階重蜀道藩垣之寄風傳除日雷動散聲敵因三軍
謀帥之初借進一介憂邊之論惟時井絡接壤要荒彼
方虎視以窺秦此復獸窮而竄洛黃河未泮烏猶知他
木之棲青草一生馬豈計誰田之牧頃焉其擾職此之
由以國威若喬嶽之安而士論尚驚濤之駭藩鄰有閩
雖無待于纓冠門戶或闕恐未容于奠枕非得五百年
山川之秀孰寬六十州屏翰之憂恭惟某官卻穀詩書

吉甫文武人物三槐之望家聲五桂之華范老子百萬
兵素負平西之略張忠定一箇信蓋在用蜀之規自怒
翮之培風即貴名之起日緹屏展驥冀北之羣遂空畫
戟憑熊漢東之國為大繼秦霜臺之最爰登月寺之丞
受瑞析珪肆陟列岳保釐之任握蘭位棘載彰公朝登
用之階屬坤維當夜柝之餘而帝宸切宵衣之顧謂洞
庭八百里已息鯨波而岷峨半壁天可無鼇柱荆楚雖
資於叔子褒斜必賴於孔明左右論思乃進承明之侍

從兩班顧問游膺延閣之圖書暫遲康侯晉接之榮俾
正長子帥師之重甫開玉帳已聳金城自是置京洛于
目中運梁益于掌上醫治根本奕定規模一伊呂之復
生百符石之何慮清廟貌而定鐘簋佇洗甲兵詠几歸
而歸衮衣徑躋鼎鉉某頃叨餉幕獲便親庭辟屬茗臺
正愧荷薪之弗克綴負容府尤慚據蒞之非宜方茲俟
報於公車未敢遽辭於鞅掌歌昌黎郟城之句從軍敢
與於笑談勒孟陽劍閣之銘珥筆願書於勳業

賀湖北岳漕除帥

漢節疇庸楚都宅牧班聯玉筍載陞九扈農正之華略
倚金城式重十乘元戎之望眷隆旒冕喜動紳綏維是
荊州素稱督府控三流之上孫劉之所必爭踞二長之
中吳蜀之所胥會豈特襟帶咽喉之自昔尤為堂奧心
腹之在今總百萬兵甲而指縱由之環十五郡國而生
齒繫是要必得嵩華終南鎮時之望庶克副洞庭彭蠡
溪惠之情恭惟某官名闋甘棠中原喬木說禮崇書之

雅尚牧人御衆之長才斯民望為福星未誇涑水百子
駿之譽萬物得以吐氣遠邁春陵十元結之思學術障
百川瀾而東之事業搏萬里風而上矣公車通籍便宜
登清要之津邊徼揚鞭迺益勵忠孝之節自涕袴襦于
侯國即煩領袖于籌帷國有人焉藜藿為之不採誰可
使者原隰逆以有光春容鄴侯給饗之規修舉中丞平
糴之政有條井井餘地恢恢屬陝以東陝以西寄欲分
于周召謂洛之南洛之北効已試于石溫遂躋鴛鴦之

行同護熊羆之旅山川草木熟知萬福之威名鼓角旌
旗重見孔明之營壘第恐紫皇香案之注想靡容太乙
玉帳之久勞不俟突黔即湏緋綠某箕裘謾學樗櫟散
材辱拔茅嘗以其彙征愧析薪弗克于負荷贅之幕底
顧童子何知焉援以階升微公賜不及此感懷惟舊聞
命載新鴛駘方息於長塗賀燕亟鳴於廣廈前茅後勁
願承晏御之驅馳小桷大梁尚藉郢斤之斲削

賀別安撫再任

疇庸外閣錫寵中宸一代堯章爰晉東壁圖書之府十
連周陝仍分西門鎖鑰之權俶播先唐歡聲旁午恭惟
某官朝家柱石江漢金湯楚璞韜竒秦氏十五城之莫
易郢歌調古巴人數千曲之難追頃繇禮樂之皇華來
作詩書之元帥撫摩飢饉轉而為豐年樂歲之時宣布
慈祥溫然如春風和氣之際遂使黎人賴賢牧之德不
翅赤子于慈母之心茲潁川方借寇君而關中復留蕭
相牙籤玉軸丕昭雲漢之文茲矢彤弓增重風寒之寄

祗虞荆渚難泊商舟某久出恩墻近詹帥鉞雖阻陪於
厦燕亦與喜於屋烏春滿桃源自恨凡蹤之難再日長
棠舍庶幾清蔭之終依

賀別留守除兵書兼淮西制置

穆卜剛辰肇開大閩曳文昌之星履不移龍盤虎踞之
都建太乙之雲旗兼護鶴唳風聲之旅全藩維之脉絡
新壁壘之精神麾幟晶明鼓角雄亮眷是淮堧之統部
久懷江左之恩波蟻戍踐更勤我師徒之命雁民托處

賴吾父母之歸上下千里聲勢相連南北一天封畛何
限是必猶身之使臂庶幾如齒之有唇屬之鉅儒遯哉
盛舉恭惟某官貫日精誠之照世格天厚德之在躬表
帶臨戎文武作萬邦之憲鈞樞入輔儀刑積四海之瞻
由卧護於陪京寬顧憂於中宸屹若喬嶽泰山之不動
了無洪濤巨浪之或驚然烽火隔江屢費舉鞭之問雖
舳艫列岸未酬擊楫之心茲正司馬九伐之權益重元
戎十乘之寄瞻言大勢蓋兼呂蒙滿寵之舊規尚論古

人當以安石茂弘而自許了碧油之整頓登黃閣以經綸某夙受殊知欣聞新令脩履杖於征西府猶未忘執御之陳迓車馬於上東門行且展望塵之拜

賀趙京尹升大資

陞華書殿視秩政塗經四方以尹王都久聯班于喉舌間兩社而為公輔爰進位於股肱京邑增崇紳綏胥於竊以輦轂浩穰之政實為鈞衡晉用之階在天聖時劉沉自茲而登相位逮寶元際祁公由此而踐樞廷中興

而來近比固有然未若著八方之顯績膺九陞之深知
寵渥沓來前聞創見恭惟某官璇源毓派若木翹英六
鼇戴山身可任天下之重萬馬駐足力能回世道之衡
應變若珠之走盤剗劇如竹之迎刃平生敬歷一片忠
勤自表則于神臯佐更張之聖化江濤如此磐石晏然
發姦摘伏以如神厲善抱公而弗擾况侍使殿從容之
御久推中臺啟沃之猷邦計裕而賴劉晏之算鞭銓衡
公而服山濤之藻鑑宜加典冊式重封幾朝廷有范君

京師有布文固輿情之素屬走卒知司馬兒童知君實
茲柄用之允諧自是相鴻業之金甌紀駿勛于玉鉉躋
時乃又垂聞無窮某昔受氓塵嘗陪宰旅荷殊知之不
薄聞異數以惟欣夜雨江湖自分老魚鰕之侶春風廈
屋不勝馳燕雀之心

賀浙西憲兼嘉興兼提領田事趙寶謨

晉直禹謨出將漢指上臨軒載遣俾令有邦有土以祥
刑公弭節一行豈止厥賦厥田之底績班迺三階而暫

輟令行數道以維新成命風傳先聲雷動恭惟某官沛
易楚詩之望晉桐衛梓之英一貫親傳師友淵源之莫
及兩科自奮文學治理之咸精鵬騫牛斗之津驥騁雲
霄之武丹書獻議釋之定國之並稱赤縣馳聲卓茂魯
恭之亟召遂即丞郎之步武特贊軍國之紀綱周旋幾
年儀刑二監都曹學為宰相方資鼎味之調刺史國之
外臺爰賴轡絲之攬以斯地去尺五天之不遠併煩公
兼丈二組以惠臨刑章佇見于修明事力何憂于凋瘵

司政典獄惟作牧暫上德之來宣立相納誨以輔台非
宗臣其誰屬某壯心零落病骨支離橫槊馬頭竟成何
事帶經牛背將老此生當杜門省咎之時有受塵為氓
之幸此獲誦榻前之再疏固已窺管中之一班公在朝
廷在江湖諒文王用心之無間我有田疇有子弟得鄭
僑為政以何憂

賀廣西豐憲

星使乘輅指碧筭而行部日官差穀拂紅榴以建臺敢

肅鯉絨用申燕賀恭惟某官人門具美天分素高青冥
強箭之威稜紫霓神鋒之材切舊家風烈此笏乃今之
甘棠闊步雲霄華萼相輝于唐棣高騫難省游剖苑符
暫馬覩嶺嶠之風正以遠長安之日蜚蠻交錯類容蒲
澤之姦狴犴多寃罕見草靡之鞠潔水壺而載泣洗煙
瘴之一清杜頌甫賡荷囊立召某猥公藩服幸際使華
當弛擔之方新正代庖之非據先庚聳聽旁午騰歡相
傳五嶺之宜人不妨叱馭自此二天之獨我何幸交龜

賀鄭少卿知嘉興府

疇咨卿月易鎮扶風駕丈二紐以惠臨新民視聽去尺
五天而不遠重帝股肱俶播先庚歡聲旁午恭惟某官
家康成之學世子產之才一貫親傳師友淵源之莫及
兩科自奮文學法理之咸精鵬騫牛斗之津驥騁雲霄
之武棘庭讞議釋之定國之不寃棠舍撫摩渤海潁川
之可紀頃自玉階之入覲亟由金掌以升班方邇列之
屬心乃外庸之馳志眷茲樞李近拱京畿邦計昔素號

于從容民力近頗聞于凋瘵今得老成之彥庶消愁嘆
之聲屈汲黯于淮陽寧久私于茲土著望之于馮翊行
當造于本朝墨突未黔漢囊即紫某壯心牢落病骨支
離塞上分弓竟成何事田間荷鍤將老此生當杜門省
咎之時有受廬為氓之幸雖本水盃之獻決無上補于
吏師桑枝麥岐之歌尚願相贖于儒館

可齋雜藁卷五

欽定四庫全書

集部

可齋雜藁卷六

詳校官庶吉士臣吳烜

主事臣呂雲棟覆勘

總校官庶吉士臣倉聖脈

校對官原任典簿臣郭祚熾

謄錄監生臣連彭年

欽定四庫全書

可齋雜藁卷六

宋 李曾伯 撰

啟

代蜀總通四川崔制置

望紫荷橐九重端寄於腹心依碧油幢一節幸聯於臂
指方涓日交龜之云始豈趨風貢鯉之可稽恭惟某官
商周渭巖嶺蜀雪日有碩德雅望士論之所同歸無智
名勇功君子可以大受出處淵乎似道富貴了不關心

久矣踐馭結于東注擁節梅花之外遠有光華含香錦
帳之中寢躋清切小駐平山之欄檻屹成萬里之金湯
峻召來歸席遽前於夜半聯班侍從位實亞於冬卿屬
上念井絡之區以公任藩垣之寄輟枚徐於禁內借重
西陲得韓范於軍中寬憂北顧然而繫雪山之輕重孰
若佩天下之安危趙清獻由茲而踐政塗文潞公亦入
而居宰路此袞衣繡裳所以趣覲而青簾畫舫行且朝
宗舊軌既同新麻可必某轡絲謾攬鞿綫無長幸於十

乘未行之先知有萬間可托之所燕來鴻去會達尚及
於此時翼附鱗攀依嚮尤深於他日

代通興元丁帥

雙節觀風蜀部玷轡絲之選十連作牧漢關專鎖鑰之
雄官塗何異徑之分國事有同舟之幸不腆邑敝敢致
邦交恭惟某官蓋代英名昂霄偉志得天地正直之氣
為社稷中興而生四十圍溜雨霜皮凜持勁操九萬里
搏風雲翼蚤入壯懷不辭州縣之勞已有廊廟之器道

德流於壁水教條著於蘇臺接武郎闈多士出權衡之
當疏榮匠監百工稱技巧之精績用既彰東知益懋謂
畫江以東不足以究中流擊楫之志而分陝以西粗可
以成高屋建瓴之形及究觀灞上真人經營棧道之區
又自昔隆中宰相指麾斜谷之地邱墟之陸沉在望山
河之風景不殊播一韓之謠遂開大閭下三秦之檄已
動中原適罹小雅蓼莪之悲爰用春秋墨經之典一致
忠孝斯世重輕書殿陞華位望已登於紫橐政塗錫命

姓名行覆於金甌某久矣游邊晚而沂峽念刑獄之寄
已重而錢穀之問方殷幸竊富鄰密依廣廈緯不遑恤
誰其念嫠婦之憂樂俾有瘳庶或借良醫之惠

代通瀘南楊帥

修門筮官久瞻文昌八座之尊涪部祥刑幸托元帥十
連之重信蜚緣之厚矣豈際會之偶然恭惟某官學問
儒宗禮樂王佐岷峨之山幾千丈與雪俱清坡頽之文
二百年遺風再見不事州縣鴈鷺行之問即躋朝廷鵷

鷺序之聯槐省蓬萊屢更清要粉闈蘭錡洊著聲華遂
陳犴狴之箴爰直螭坳之史典舜五禮繼持橐於甘泉
位周六官方紬書於東觀上思命相如之檄以諭蜀公
乃抗諸葛之表以渡瀘孺傳登朝若水以同州推官而
去錦衣過里魏公以武康節度而還坐寬九重殿西之
憂抑使六詔雲南之服第虞銀信促正鼎司某自揣謏
材謬將臬寄甫抵司存之所決獄幾何偶膺王事而來
會計而已正懼中流之罔濟喜于外閫之方新詹彼帳

轅但切聽尚書之履芘之厦屋庶幾安使者之車

代通瀘南曹帥

詠太白上蜀之難誤將繡節誦孔明渡瀘之表幸托碧
幢雖九天趣駕之莫留而一日同舟之亦幸在禮有贄
不文何辭恭惟某官相國參之規摹陳思植之藻翰文
字五千卷胸中浩有於江河才名三十年學者指之為
山斗巍科角立要路鼓行金闥焜耀於聲華壁水周流
於道德訪沙洲之鸚鵡雪泛千艘聽雲安之杜鵑月分

別乘爰擬伊川之易傳廼持子產之刑書德星移駐於
遂州益隆臺節愛日均孚於涪部大啟轅門扇以羽而
蠻夷自服於孟降檄不草而父老昏諭於漢指西門之
鑰固矣東山之袞歸兮公之此行登仙上且爰立作相
某蚤為邊役晚効蜀遊問決獄之幾何曰會計而已矣
殊無柝線曷理亂絲君去我來眼喜謝公之墩在事繁
交冷心隨工部之舟歸有以教之抑又幸甚

代京西漕通四川桂制置

蜀道分弓夙仰詩書之帥漢庭出節猥膺禮樂之華瞻
屏翰之上游喜關河之相望屬新祇命敢後修辭恭惟
某官一德老成兩朝鴻碩青山三百疊鍾簪橐之名流
丹桂五枝芳極衣冠之盛事分九重之天顧護萬里之
風寒忠定之治似諸葛公人服神明之見清獻之名過
蕭太傅士知廉節之規况能持力量之堅凝運精神之
靜定雲山玉壘翁令自得於蠶鳧湯池金城足制方張
之蛇豕我車旣捷公袞盍歸勛名了劍閣之銘事業看

沙堤之築某志雖徇國材愧承家十年佐幕之何功一
障乘邊之已老東西阡陌手披荆棘之蒙茸咫尺穹廬
身歷烟蕪之蒼莽正恐習俎豆而未能軍旅之學當干
戈而盍圖襁褓之功敢期獲護之誤知乃俾駱駟之倣
駕甫丞蘭錡遽直木天既付之轉輸斂散之權仍寄以
參佐蕃宣之任凜然一髮引以千鈞賴大閭之幸逢有
餘波之可及攬轡而馳江漢緬懷問俗之清芬踞鞍而
望褒斜願示足兵之良畫

代通四川桂制置

玉壘殿邦茸嘉縣擁四封之重珠曹筮仕青衫玷三語之
微天開際遇之機地在按臨之下依棲樾蔭荏苒瓜期
不虞厥足之趨趨敢布此心之附麗恭惟某官兩朝碩
望千載真儒典型大雅之遺音學問中庸之至性青山
三百疊挺人傑以地靈丹桂五枝芳詫源深而流遠早
際明昌之運亟登清要之途十里淮源甫膺分月一麾
狄障即委護風宣流黼袞之仁聲振厲繡衣之精采三

邊烟靜已寒朔幕之羶十乘星馳未暖渚宮之席屬時
宵旰遠顧岷峨營柳成薇將建碧油之旗鼓省蘭位棘
峻陞黃道之衣冠繼登枚徐侍從之班爰重周召方伯
之寄兩年秉鉞四塞維城敵聞裴度之威名人樂子儀
之寬厚比聆元日果錫贊書用陞真學士之班益聳小
朝廷之望清廟貌而定鐘簋佇洗甲兵詠几寫而歸袞
衣經躋鼎鉉某少不更事癡未了官祇堪玉川耘耔之
充詎知柴桑紙筆之好肯堂肯穫厥父若是勤勞為箕

為裘其子乃弗負荷不圖冒昧茲在趨承版籍憤然決
無河東三絕之譽條章情若焉有斗南一人之稱不遠
蜀道萬里以敢前恃有冀州二天之在上假之歲月厚
若邱山自今鵲或許於枝依庶俾燕少安於巢戀詣大
府而受約束又當聽命於馳驅知厦屋之為旡曠尚冀
芘身於凌震

代蜀總通夔路王漕

擔簦作蜀雪之遊比嘗假道臺節接漢星之分敢後修

盟母曰幾於費辭所謂未能免俗恭惟某官活民敏手
蓋代英材閱閱摩雲鳳閣三賢之華胄聲猷起日花溪
八詠之清風彩纓富貴之津迎勿事機之地早遊幕府
西南已識於相如旋旌藩符江漢共稱於申伯踐敷既
久眷倚益隆謂瞿滌一門之衝踞吳蜀二長之會萬貨
盈虛之計既資於鞭笏三等能否之林仰賴於權衡暫
煩轡絲原隰之華果著水鏡金湯之詠惟流馬方殷於
斜谷俾杜鵑少聽於雲安留丞相於漢關顯膺明陟用

夷吾於江左會見疇庸某猥以樛材領茲臬寄甫抵司
存之所即為王事之行雖家貧幸有於富鄰念民瘡若
何而肥國緯不遑恤自憐嫠婦之愚藥俾有瘳正藉良
醫之術

代通李達州

二千石以嚴邦方獨總六條之寄百八珠而試史况令
兼三尺之科辱知辱眷雖再世已然受察受容實今日
以始敬修鴈贄庸闔龍門竊惟郡國之設官雖曰掾曹

之卑列然而版籍登耗之任法律重輕之司必善判如
韋嵩始能稱河東三絕之譽非賢才若仁傑何以副斗
南一人之稱僮俾孺子共之其愧昔人多矣伏念某受
材弗穎涉世未深正猶雛燕之尚巢強以沐猴而使冠
室肯堂苗肯穫恐玷前修弓為箕冶為裘已荒初訓僥
踰一秩周歷五霜雖銓闈久若先拾之樵而選限尚如
未熟之果適因御李切願依劉夜月遶枝姑卜棲於弱
羽春風擇木果大契於夙心顧手非霹靂之是長而身

豈塵埃之敢避望蜀山萬里之遠欲進未能微冀州二
天之依何恃不恐恭惟某官中朝德望斯世典型家聲
仙李之盤根材價荆山之片玉堂高瓢樂人稱水擘之
清風樓記籌邊世蘊金湯之偉略果以壯猷而自見亟
為當路之深知萬廩腐紅致貌貅之宿飽千山擷秀與
騏驥以翁來既藹著於事功合徑躋於華要一同撫字
半刺回翔天下玉泉山衆聳觀於墨妙壺中蓬萊郡政
咸樂於香凝江漢幾暮星霜一節茲疇咨於綠野爰起

為於蒼生翠色龍盤餘暇不妨於柱笏紫泥鳳詔褒陞
佇看於荷囊何幸么微獲在奔走某敢不激昂鈍質澡
雪懦衷毋失名譽善事上官當首持於勤謹豈無他人
不如同姓尚有望於品題

通京湖陳制置

制閫掄材幕府盡收於清望帥垣設屬陶鈞猥及於庸
人向雖膺特達之知今始遂趨承之願方將祇役敢後
修辭眷惟襄楚之鉅邦自昔人材之會府陪叔子於峴

首必鄒湛而後從依劉表於荊州非仲宣而奚稱况今
兩道實總一司雖微而麴蘖之官亦俾在樽俎之列匪
求雋異曷副搜羅如某者賦性棗昏受材樗散謬繼勤
勞之父稼未能負荷於子薪鉛繫荒蕪滄玷有司之辱
塵埃汨沒已甘俗吏之歸頃為蜀道之游就服菜庭之
役塞井夷竈國事焉知食藥飲水家訓是守偶辱憐於
當路獲交辟於公車數月閭僚真成畫餅逾年茗椽徒
愧濫竽雖薦負頗類爭先之樵而資考尚猶未熟之果

適捧便親之檄已奔入蜀之縑迹陋轅駒方緬懷於舊
主身隨巢燕知復傍於誰家不圖化冶之收乃在羅致
之選杯傾竹葉豈徒賡進酒之歌角聽梅花且遂賦從
軍之樂恩深蒙籥感激輪囷恭惟某官六經儒宗三代
王佐直方大取諸坤道仁智勇得乎中庸泰山巖巖復
見聖賢之氣象源泉混混孰窺學問之津涯盛名著而
遐邇知有范公德望隆而兒童亦誦君實精忠一節翊
贊兩朝自朱幡奏保障之功而繡斧擅平反之譽路車

乘馬爰分維屏之權
屯貞彤弓屢錫有功之典
由蘭闈之步武
即棘路之光華
紫荷持囊
遂晉西清之獻納
碧油建闈
愈隆南紀之保釐
留屯舉而野有餘秉
滯穗之羸壁壘
修而邊無遺矢
亡鏃之費勢
雄蛇首不聞淮壩
尾大之虞
威戢狼心
自絕劍棧
齒寒之懼
茲十有星霜
之換而一無烽火
之驚
銘彝鼎
銘旂常
已書勲於盟府
作鹽梅
作舟楫
佇正位於宰廷
何幸么微
獲奉奔走
某敢不恪恭
厥職
勉勵乃心
奉上官而無失名
寧恃昔經

於題品儻癡兒之不了事尚期終賜之幘幘

通江陵別帥

烏幘禮賢嘗獲剡薦書之墨阮厨設屬且將吹賓席之
筭念辱知辱眷雖閱於有年而受察受容始遂於今日
方當祇役敢後修詞恭惟荆楚之鉅邦自昔人材之會
府龍山落帽蓋嘉之醞藉猶存漳水登樓王粲之文章
具在况今帥閫尤重禮羅雖微而麴蘖之司亦俾在樽
俎之列匪求英曷副選掄如某者窺管材疎挈瓶智

小少也箕裘之粗習壯而鈎繫之就荒萬里馳驅僅濟
艱難於父稼一官漫浪未能負荷於子薪偶當路之垂
憐辱公車之交辟贅員油幘祇成畫餅之羞列稼茗臺
徒有取困之愧適捧毛義便親之檄已棄終軍入關之
縑列剡箋天雖浮圖之既合計資積日猶累土之尚虧
嗟鵲枝方夜月之依依燕壘有春風之托杯傾竹葉豈
徒廢進酒之歌角聽梅花且遂賦從軍之樂采葑過望
據疾增慙恭惟某官郢水鍾神荆山孕秀人物玉壺之

永貯風姿金掌之露凝白雪陽春絕世想清高之韻太
羹元酒存心皆澹泊之真惟力量大斯有大規摹惟議
論正斯有正施設自登魏級立上要津繼陪湖南賓客
之游卓冠冀北士卒之選飛書走檄十年贊轅帳之籌
出幕持旌千里沸袴襦之詠忠孝靡容於二致險夷不
間於一心歌皇華遣使臣爰攬周原之轡作中軍謀元
帥載分晉幄之弓遂由月寺之丞峻陟星郎之位旋晉
東壁圖書之直益隆西門鎖鑰之權長城屹屹而地聳

四維大江沄沄而山立一柱憂顧已頓寬於九陞威名
將盡護於三邊銘彝鼎銘旂常佇書勲於盟府作鹽梅
作舟楫行正位於宰廷何幸么微獲奉奔走某敢不恪
恭厥職勉勵廼心奉上官而無失名寧恃昔經於題品
儻癡兒之不了事尚期終賜之解幪

通淮西尤帥漕

給饋餉鎮關中聲聞大府求文武致幕下猥及庸人以
粉梓之寒荻在芙蓉之華選允由公計固豈私情屬襍

被以首途敢孽賤而奏記竊數右淮之參佐盛推先代之材能幼度風鶴之師則謝石元伊贊其夫晉公雪鵝之捷則馬摠韓愈相其行佳哉賓主題在方冊慨遐蹤於往昔圖盛舉於方今內而固吾圉之藩籬外以應中原之機會如介石終日其間髮之不容非斷金同心未免肘之或掣故凡引而心腹之助必自擇於耳目之間如某者種學尚蕪賦資不穎非晞驥之乘也類沐猴而冠之薄宦塵芬鬚駸駸兮欲雪積憂熏灼心炯炯者幾

仄固嘗執橐弭於戎行供文書於會府祁山斜谷登梁
蜀用武之墟漢水方城覽春秋爭雄之蹟險阻難更於
邊面夢寐不到於淮頭敢期公方拯溝壑之孤蹤乃值
上適有金湯之隆委偶同啐啄遂在驅馳顧無祖生先
著鞭之才曷稱慈明未下車之辟一新造化百倍聲光
暗月登城再憶從軍之賦平沙列幕重懷出塞之吟撫
微分之僥盈佩異知之特達恭惟某官與邦巨哲經國
遠猷文獻典型蔚有乾道淳熙之舊淵源師友親承武

夷洛學之傳由涵養熟而踐履純斯力量到而事功偉
上第早年之魏占大庭諸老之爭推州縣備更不作勞
人之嘆江湖高卧每懷憂世之心幸杲日之大明喜片
雲之慰望蕭艾去而蘭菊方盛鳩臬伏而鸞鳳飛翔去
國幾年直氣仍存於凜凜分曹兩地嘉謨克贊於洋洋
進退實係於重輕仕已不形之喜溫甫辭北闕復起東
山緩帶臨戎膽落數淵之顛獺輕車轉漕氣增壁壘之
虎貌意局面今類乎雌雄未決之碁非醫手莫起乎膏

盲既壞之症草木素聞萬福此敵何憂朝廷熟知弱翁
豈公久外佇洗三邊之氛祲即攜諸吏以崢嶸曷售蠟
鞭亦塵珠履某敢不服膺左右盡瘁始終朝取一人暮
取一人非處士之尤而則愧智者千慮愚者千慮有狂
夫之畫以願殫

通淮西楊制帥

制閭殿邦新元戎之風采帥藩列屬備下士之使令以
曩為嘗奉於教條而茲復密依於統部黃緣甚巧芘覆

有歸顧就列之云初豈修辭之敢後恭惟某官岷峨間
氣沂泗正傳聲華海宇之宗工人物廟堂之儀槩洽聞
博物盛談西漢之文章儉德清名大振晚唐之風俗由
摘髭於魏級即策足於要津發輟芹宮贊籌蓮幕徑趣
周行之武爰膺故籍之司錦製畫簾姑民庸之自詭析
沉夜觀倚邊書以居多春容驥足之暫馳赫奕隼旗之
再駕滄浪千里既騰管鑰之勛蜀道一方兼總襟喉之
重談笑獨當於方面簡知益注於上心戎監句稽將俾

近長安之日庾臺詢度乃仍護楚塞之風方茲披南北
之版圖開荆襄之幕府屬將右閫尤重中權訪叔子於
峴山雖幸晉風流之復見走老瞞於赤壁實為吳形勢
之上游以易地則皆然斯自天之有命峻陞寶閣增重
金城果而新號令於臨淮立見沸歡聲於魏博中原在
望外域奚憂柳雅韓碑佇紀功於清廟房謀杜斷即正
位於泰階某素不如人何能為役艱難之髻早雪少壯
之心已灰江漢未歸憂條纏於風木邱園屏退夢不到

於烟蕪昔嘗令會府之充員已力丐公朝而許免出於
券外茲在選中窮猿奚擇木而棲鴛馬實戀軒而至二
天獨有一介何虞持平日之辦香喜遂私心之附麗軫
昔時之敝履願毋大造之棄捐

通淮西沿江史制置

文昌為帥長擅江淮形勢之雄別駕曰治中兼藩翰賓
僚之列雖駢贅無裨於左右然甄陶有賴於始終斂版
載趨奏緘敢後者武昌之巨鎮實江表之上流自昔主

賓居多名勝非庾翼為士衡之佐則殷浩從元規之游
西門柳外餘迹尚存南樓月邊清談可想况巡管今魚
於兩道而翹英盛集於一州將俾贊於藩條且與聞於
徽畫非才輕畀有覲前修伏念某結約亡竒輪困寡用
早欠書生燈火之力墮在俗吏刀筆之陳幕府幾年歷
落嶽嶽之可笑疆陲萬里艱難險阻之備嘗剝落風霜
彫零齒髮每念不遑於將母此身何可以許人比奉闕
謀入承廟算瓜期待戍雖令觀濠上之魚樵隱移文正

擬聽華亭之鶴詎意值晉公之向闕首能見王導於過江開新府之芙蓉翁來羣彥收舊時之桃李亦及孤菱致汲引於公朝俾勾稽於武庫置之末席待以副車猶青檀久去於主人而赤子仍歸於慈父舳艫千里將令備徒卒之驅鐘鼓三更再獲奉元戎之令往未酬於知己今始遂於委身恩遇深報圖曷稱恭惟某官渭莘人物燕魯世家出處係斯世之重輕用舍關生民之休戚文事武備集夫子之大成智名勇功了天下之能事

早倫魁於多士即賓客於諸侯每惟王業之偏安已蘊
中原之大志迨更麾節爰建帳轅招懷沙漠之羶裘肅
奉寢園之弓劍收功旦夕刷恥古今贊帝王之萬全政
務老成之算付山河於一擲肯為徽幸之圖向使少遲
元嘉北伐之師則已克濟建武中興之業間無容髮徒
有噬臍嗟局面今類乎雌雄莫決之碁非醫手孰拯乎
膏肓已壞之症申伯式是南國疇與保釐安石其如東
山遂煩特起攬門戶藩籬之全勢為華夏蠻貊之主盟

威名素孚精采果異當見赤壁走老瞞之魄又將淮淝
繼幼度之勲紹奕世之三槐屹擎天之八柱佇歸袞舄
永著鼎彝以勗庸方赫赫之如斯於寒暖猶拳拳之不
舍陝東主周陝西主召雖兼二伯之尊洛南曰石洛北
曰溫惟恐一士之失致令舊物亦玷後陳某敢不欣巢
燕之重棲勉磨牛之故步長江護寒數處庶幾備維楫
之施廣廈大芘萬間尚冀為楠梓之用

通江陵別制帥

擁元帥之旌旗盡護荊州之地級冗員於藩翰復依冀
部之天宙緣特異於他人造化將開其終惠屬方祇役
敢後修辭惟武昌素重於上流而人物舊多於名勝於
庾翼為士衡之佐尚存西門柳外之流風如殷浩從元
規之行猶想南樓月邊之雅興矧茲統部兼有江淮將
俾贊於藩條且與聞於閫畫非材輕畀有覲前修如某
者無以踰人何能為役萬里身親於絕塞十年客走於
諸侯寸輓尺推間舉手而援者數竒分薄輒交臂而失

之雖戊期將觀濠上之魚而歸夢正憶華亭之鶴屬入
陳於兵事廼誤玷於周行曾未息肩俄而易命言念不
遑於將母此身何可以許人夜觀燈前徒愧郾城之時
雋秋風帽底幸荆渚之主人貪尋巢燕之重棲勉策
磨牛之故步駢足枚手曾何適於驅馳血指汗顏恐必
貽於譏誚非前茅之在望顧小草之何依昧於此來恃
以亡恐恭惟某官詩書宿望文武全才清風周雅之遺
音白雪已歌之寡和洛涯曰溫洛涯曰石早空處士之

羣軍中有范軍中有韓久負方伯之略越問津於江漢
亟振策於雲霄出幕持麾草木皆知於名譽登車攬轡
隰原遠有於光華險夷一致之備更忠孝兩端之俱盡
出處進退了不介於胸中安危重輕常有關於天下屬
時多事軫上深憂謝安其如東山用煩特起申伯式是
南國疇與保釐遂繇督府之訏謨爰建制堙之節度甫
升於省載晉寶儲繼即寵以除戎乃峻登於論譔風采
如故營壘麾幟之不更日月幾何城郭人民之若此整

頓奕枰之壞局調腴藥籠之良方啟蚋冒之山林載鳩
楚境剪駒支之荆棘盡獮戎庭自茲了勲績於鼎彝運
樞機於廊廟僥踰舊隸依附下風某敢不益勵疲駑恪
恭奔走楚璞雖慚於再獻郢斤正待於一揮倘念李蹊
未忍彼夷於官道少回別眼尚期自見於師牆

通沿江別制帥

任隆漢鑰新元帥之碧油禮重燕臺取陳人於素鞞登
龍門而雖早趨燕幙以再春德厚肺膺感深涕泗若時

巨鎮繫古秣陵乃江左之陪京為人才之會府見諸史牒往在晉朝茂弘佐興復之初則首招顧榮賀循以收南土之望幼度任征討之際亦惟得桓伊牢之以贊西淝之功故能新亭把酒慷慨以折楚囚之悲別墅賭碁談笑以致秦軍之却豈徒天險抑亦衆謀向非得若而人豈不誤乃公事矧惟今日尤重昔時護數處風之寒僅一帶水之隔投鞭淮浦馬常欲於飲江荷檐石頭鴻奚安於遵渚雖千里舳艫之在望而三邊牖戶之浸疎

幾於號虞唇齒之可憂或者杞魯瘠肥之猶忍高談者孰知問東米之價遠慮者未見精北府之兵求文武材能張吾軍者凡幾論中外事不如人意者尚多公於此時上以相屬將為根本之計正在籌畫之間仰稽前修孰稱未議如某者筆花不潤檄草甚蕪一官遡上水之船幾鞠費平生之辰鷗心舞而不下莫適天機馬力盡而猶求徒為人馭棲遲歲月剝落風霜一麾俾試於民庸三釜擬酬於親養雨桑方徹風木不停禮甫畢於松

楸分永淪於溝壑詎期陶冶未棄涓塵念其小雅蓼莪
之悲起以春秋衰絰之典總非突弁記童子之從遊敝
蓋舊帷歸主人之拂拭遂叨漁涯俾贊壯猷二水三山
恍對洲前之白鷺十年一夢驚回枕上之黃梁自頂至
踵厥有生成以口語心慙無稱塞恭惟某官國之元氣
學者泰山抗高節於忠孝之階折遐衝於詩書之府子
蕃南國屢騰申伯之勲分正東郊爰任君陳之托壯虎
踞龍盤之王氣清鼇吐鯨擲之驚波營壘之精采頓新

已竦聞於威令山河之風景不異方坐應於事機自茲
障狂瀾於百川何帝賢長城於萬里建大勲業未誇陝
右之范韓在小朝廷宜得洛涯之溫石顧居人後亦立
客間某敢不收百念於已灰持丹心而如日後孤邱之
一死荅鴻造以終身寧飲建鄴水不止武昌居第懼有
疑於避就但入玉門關不望酒泉郡所祈終賜之生全

通京湖賈制帥

制閩上流分天子旌旗之半典州兩嶠在王人版籍之

中拜手絨藤通名籤隸恭惟某官稟天間氣為國世臣
包羅宇宙之襟懷叱咤風雷之手段兵有百萬之在胸
腹夷夏之所竦聞年未四十而秉鉞旄古今曾不多見
蓋自建宣室治安之策已共期雲臺將相之才盤錯偏
更聲華益茂衆且駭浪驚濤之凜若公猶光風霽月以
臨之鸚鵡洲前但見賦詩而醜酒貌貅竈底自令腐粟
以流錢既儒效之翕聞斯上心之愈眷爰自長江之門
戶遂開大府之藩垣號令甫更皆謂過汾陽之精采規

模既定孰非服叔子之威名匪由允文允武之薰資安
得足食足兵之如是慨懷荆渚密邇中原西州江水之
相通南峴烟沙之在望臨風舉扇能無忠武之思落日
登樓應動景升之恨奉玉斧整齊之畫收金甌玷缺之
區啟蚡冒之山林載鳩楚境剪駒支之荆棘盡獮戎庭
匪公其誰舉世所望酬先正欲酬之大志了諸公未了
之雋勳龍作納言已正舜庭之喉舌虎拜稽首當為周
室之股肱某牢落壯心蹒跚蹇步平生幾履疲疆場以

何之卒歲一裘老田園而足矣誤荷上恩之收拭俾分
南服之蕃宣冒然一來凜甚百謫念結習久從於先世
而揄揚每及於孤蹤茲以小邦幸事大國烟深五瘴祗
虞病骨之支離星煥六符止仰英躔之臨照

通成都黃都大

詠豕腹於彌明之鼎莫離瓶罌登駿骨於燕昭之臺誤
編早樞風塵頓絕雨露所濡未殫足力之驅馳先寓舌
端之依嚮伏念某體輕性滯力小價微揆才無一寸之

長揣技之千里之逸連年侍宦遍更五原秋草之肥幼
歲學書猶負三月春風之貢比由轅下偶置籠中錫谷
尋盟合隨訪家山之鷹爪監車服乘自知非汧渭之龍
顛屬已拜於印封抑未忘於芻豢蹤茨棘豈無渴夢
之懷聽命絜維寧免飢鳴之想錯莫尚依於主去收藏
恐待於客佳閭闔遙瞻尚隔邱陵之遠家庭親敕俾承
書傳之香茁萌芽於年窮臘盡之時環奔走於風逐電
追之地倘五花之偕判與百卉以向榮恭惟某官雙井

名家九衢獨步南州第一蓋得武夷師友之傳北冀空
羣早出河陽士夫之選自絲轡膺使華之遣而金甌深
相業之思天馬十二閑就俾問揚鑣而追日月團三百
片靡勞司擊鼓以助雷化工方有賴於蟄驚人物皆爭
歸於蠅附駕騅駟駘駘之乘不棄凡鴛處桂椒桺
櫨楓柞之林靡遺小草遂令款段亦玷封纏某敢不苦
硬存心權竒勵節造父夾輶王良執轡願益堅飲水嚙
雪之思盧仝敢歌陸羽作經尚願助分江貯月之興

通湖北許憲

名藩弭節聳隘原禮樂之華別駕綴員兼幙府文書之
椽以眇焉一介之疵賤有魏乎二天之照臨受察載新
修辭敢後恭惟某官六經正學一代真儒精誠開衡嶽
之雲鑿裁炯洞庭之月乘長風破巨浪沛然泛應於事
機回狂瀾障百川豈以詭隨於俗習自魏科之拾芥即
雋軌之蜚英挂笏賓筵空冀北士夫之選塞蒙真館為
湖南賓客之光富貴不以介其心進退了弗形之色春

容華轡遊戲夷途方將問臺閣清要之津姑以佐輦轂
彈壓之政適咨閫寄爰藉機籌果聞帷幄折千里之衝
坐俾江漢無一波之警暨分使竹益茂甘棠屬秋柝之
多虞勤宵衣之遠顧寧謂戶牖之過備毋令罅隙之肆
窺雖征鎮相望何啻南北天之恨然巴陵一面正處上
下流之中用開詩書元帥之謀俾任甲兵大刑之寄臯
陶作士顧何畏乎有苗召公子蕃自可平於獫狁拯生
民于華夏躋盛治於虞周歸我公兮相中國矣某早荒

鈔槩謾繼箕裘一官客走於諸侯十載身親於絕塞文
墨議論碌碌無以瘳人機會功名落落何所集事偶入
陳於邊畫乃誤玷於周行曾未息肩遽叨易命勉策磨
牛之故步姑從幙燕之後塵附贅懸疣決無堪於適用
汗顏血指恐不免於貽譏所賴際逢獲受容察况對離
離之芳草尚存井井之成規願竭鴛鴦駘庸奉驅策長江
護寒數處一惟指顧之是瞻廣廈大庇萬間庶俾依歸
之有所

通淮西羅倉

望原隰禮樂之華肇新容察備幙府文書之列幸隸照
臨以昔嘗辱眷於門牆而茲復棲身於統部黃緣有是
冒昧此來方就列之云初豈奏絨之敢後恭惟某官任
重道遠色正芒寒先正有若保衡蔚甚一家之文獻後
來必有名世藹然諸老之典型自華貫之早登即休聲
之旁達榮途小試已存遠到之規砥柱弗搖獨立流俗
之表水蘖清名之既著鼎彝勳烈之愈彰日轉書簾籍

甚絃歌之譽燈明夜觀居多檄畫之籌茲妙簡於楓宸
將承流於荆戶肆頒明詔晉列奉常拳拳致主之素心
蹇蹇濟時之謹論上方前賈生之席以嘉納人謂有鄭
公之笏以尚存適一衣帶水之護寒指三百疊山而坐
牖令修庭戶頌藹袴襦大江之西甫政聲之赫赫長淮
以右屬民望之睽睽用煩持駟轡以觀風然且駕隼
旟而作牧講明平準修舉外攘豈徒效吳人濡湏之築
以燕安江沱方將問晉公郾城之勲以汎洒區宇斯世

之望非公其誰佇根本之厚培即精神之遠暢立騰成
績經造邇班某素不如人何能為役艱難之鬚早雪少
壯之心已灰江漢來歸憂條纏於風木邱園退屏夢不
到於煙蕪比幾從峴首之舊遊幸已丐朝端而許免出
於券外斯在選中窮猿何擇木而棲駑馬實戀軒而至
二天不遠一介奚憂雨雪載塗應念罷牛之騰駕雲霄
連廈願容舊燕之重樓

通廣西豐憲

紫紵疏恩繡衣將指天子不鄙夷其遠俗特起名流明
公爰詢度以周咨來司臬事占星臨部涓日奏絨恭惟
某官昭代奇才濟時敏手數元祐世家之華裔獨有典
刑論嘉定人物於先朝猶存風烈游刃九牛之不頓着
鞭萬馬之無前入握省蘭諸曹斂衽出分符竹三輔屬
心方催侍臣文石之班乃羨老監鑑湖之樂雖欲急流
而勇退豈容巧匠之旁觀若時旰憂遠在西嶠謂烏孫
部落當昭布於皇靈而赤子海濱或未霑於聖化爰賴

甲兵大刑之用庶寬夷夏姦宄之虞霜節一臨烟嵐盡
洗碧玉簪之坐對豈待席溫紫荷橐之立登竚頌環召
某駿尋暮景牢落壯心雖老馬敢憚一行而鉛刀豈堪
再割甫茲弛擔幸甚聯臺不惟容察之依光且遂攝承
之叙好相逢前十載細論昌黎壯夫之詩我獨有二天
尚托孺文故人之託

通金州徐守

擁十連玉帳之尊久期望履領三尺金科之寄幸預執

鞭得非際遇之天為是趨承之地敬修竿牘仰扣籤曹
恭惟某官昭代典型中朝德望文章千載之正印學問
諸儒之一燈名閥甘棠玉骨麒麟之仙種故國喬木鐵
面琴鶴之清風倚天劒泛應於事機下水船通行於官
路察物如度之省括運智若珠之走盤不以枳非鳳之
所棲方且川與魚而俱泳一同製錦桃李生春別乘岸
中湖山分月熟訪洲前之鸚鵡來吟山外之杜鵑衆水
會涪盡是借恂之父老兩峰峙劒尤多迓汲之兒童天

顧魏興地聯關表咽喉漢中之全勢唇齒京右之上流
醫治共理之良爰畀已試之效星沉夜析坐銷彎弓牧
馬之驚雨潤春耕足致賣刀買牛之俗然而西土詠襦
之雖切未若東人望衮之已深賦畫戰兵衛之詩尚勞
護塞聽孤舟野渡之句行命濟川如某者識字未多讀
書有限凡骨豈換仙之分塵容甘走俗之勞祖鉢僅傳
父薪莫負如跛鼈之步不能以寸猶雛鷹之羽未可以
飛偶叨部使者之公車俾玷郡決曹之末掾顧法家者

學非書生所長藉有依歸貪於奔走癡兒不了官事心
貽腰腹空大之譏寒士廣芘歡顏庶寬筭楚未免之歎

通史制參監丞

烏幘乘邊千里屹金湯之重楚藩設屬一官在筭楚之
微適沿檄以斯來欣執鞭之有便方將委贄敢後修辭
恭惟某官昭代羽儀中朝模楷身踵相門之衣鉢曾蟠
武庫之甲兵不驕不華一洗房杜子孫之習有典有則
蓋由韋平家世之傳以道德為志而富貴了不介心以

學術為本而功業視若餘事自英聲之起日即怒翮之
培風要路夷塗寧拂衣而靡顧遐邊絕塞乃掉鞅以肯
來由禮羅獲聘於石洪而軍事悉咨於孫楚雲黃萬頃
首陳渭濱許下之規草綠五原坐忘棘門灞上之警茲
奏功於宣室爰作牧於春陵出幙持麾隨致藩垣之固
圉修車脩器遂繇蘭錡以晉丞矧載參十乘腹心之謀
蓋已聯兩道臂指之勢堂堂風采袞袞事機碎輜輶破
穹廡行見了碧油之勲績紀旂常銘彝鼎又將繼黃閣

之儀型某癡未了官少寧更事屢玷有司之辱已甘俗
吏之歸厥室厥菑見謂弗堂而弗播不稼不穡乃思取
億以取困載瞻榮樓落日之濱甫問嘉帽西風之役不
圖制命俾列顏行祗憐步兵之厨豈堪尸祝之俎方虞
巢幙將擇枝依幸甘棠蔽芾之匪遙庶小草依歸之有
所識韓荆州不願萬戶散云未挹於聲華見蘇刺史我
有二天切冀曲加之覆幬

通江陵楊倅

夙駕油屏知暫剖漢庭之竹濫芋酒室冒馬問齊成之
瓜不圖小已之塵勞獲竊大邦之輝潤通名攸始奏記
敢稽恭惟某官粹學淵淳英姿山立幾千仞岷峨之孕
秀二百年坡穎之風流同時獨不得司馬哉久矣奏大
人之賦後世使復有子雲者方將續太元之經自魏級
之摘髭即要津之策足威宣北部判屹南山畫禪儉慕
之芙蓉教洽魯宮之芹藻策陳計簿遂由萬里以叩閭
班列司書良取一言之利國方隆上眷自詭外庸果乘

傳之未西亟改轅而以北牛刀甫試驥駕即馳茲海沂
已詠於王祥矧襦袴載歌於叔度五月報政未遜昔人
滿歲為真且循前制第恐見思於宣室復將趣侍於甘
泉某壯齒雖駸童心猶駸屢困有司之辱已甘俗史之
歸始役家庭厥菑而弗肯獲繼叨臺幕不稼而胡取困
甫緣親檄之還忽玷公車之辟未能觴政安替俎籌猶
燕方巢幙之危乃鵲有依枝之喜曾香一瓣惟恐交臂
而失之杜廈萬間僮使歡顏而幸甚

通金州晁倅

作詩而餞長史已來騎竹之童讀律而試書生尚與吟
梅之客雖無三語可之一言恭惟某官金莖露掌之清
標玉壘雪山之名勝自城南垂譽為宛邱淮谷六君子
之遊宜蜀郡知名有老泉坡顓三先生之派風雲之懷
風壯霹靂之手采彰草茂盈扉花繁滿縣爰頌朱絲之
直洵膺墨綬之華便宜泛仙槎而登瀛方且效溫亭而
隱吏當壚訪酒平分印笮之湖山岸憤哦詩一洗岷嶓

之草木曷為熟路又挽輕車果膺分虎之榮式副化鯤
之望紆丈二組暫屏翰於武階奉尺一書行羽儀於文
石有如某未之聞道無所取材見謂沐猴而冠顧非晞
驥之乘讀子虛烏有賦未能凡骨之換仙習司空城旦
書寧免塵容之走俗勿責癡兒之官事庶幾寒士之歡
顏夜月枝依正恐鵲棲之未穩春風巢近當隨燕羽之
初來母曰于行遂鄙其俗

通湖北章帥機

佐元戎之幕久瞻名閥之簪纓司步兵之尉幸托賓筵
之領袖不謂小人之奔走今惟夫子之步趨事長維新
修辭敢後恭惟某官搢紳模楷臺閣羽儀文章皆爾雅
之辭學問在中庸之奧故國非謂喬木猶有典型此笏
乃今甘棠具存風烈猶芝草鳳凰而人知其瑞如珊瑚
駉駉而世固所希粵策足於要津即流聲於上國文章
佐聘庸使其猶劣諸廩庾攸司委吏曰當而已逮雷封
之秦最由月駕以陞華謂宜召賈誼於席前奚乃屈樂

鉞於戎右公雖庶取上豈久淹夜觀成吟姑繼荊州仲
宣之賦眎庭覽奏已知大名強至之文凡此時幕謀檄
筆之遊皆指日從橐珪之選眉黃行見詔紫立頌某
壯齒漸駸童心猶駭父稼謾勤勞之襲子薪猶負荷之
羞夜雨挑燈嘆書癡之未熟秋風落帽顧酒聖以何知
不圖烏府之過憐乃以黃墟而分屬材非刈楚憂甚據
藜茲焉冒昧以敢前賴有睨矇之在上介石之不俟終
日雖慙莫贊於機籌揉木而尚遲暮年敢冀曲成於規

矩

通京湖闕制幹

聽單父之絃聲夙欽上介司荊州之酒品猥玷下僚不
圖賤跡之塵埃獲適名流之步武方將祇役敢後修辭
恭惟某官學海回瀾儒林搗藻人物玉壺之水貯風姿
金掌之露凝龍泉太阿久燭豐城之牛斗黃鐘大呂盍
調清廟之宮商自角立於魏科即鼓行於雋軌驛騶獨
步洗萬馬以昏空鴻鵠一飛累百鷲而莫及屬軍事有

咨於孫楚而禮羅遂屈於石洪密贊前籌千里而折樽
俎載稽近轍十年而持旌麾已聞玉帳之上功徑許金
閨之通籍雖千室之邑可使為之宰也無一方之憂寧
久遺諸侯乎小駐蜚鳧即陪振鷺某齒將就壯骨未換
仙屨折翅於有司已甘心於俗吏一官漫浪厥菑弗獲
之懷羞三仕棲遲不稼取廩而增愧甫沿親檄忽玷公
車疎狂而必將起落帽之嘲蕪陋而奚足繼登樓之賦
燕危巢幙鵲喜依枝哺其醜啜其糟第恐貽憂於濡首

平如衡清如水尚期取則於伐柯

通江陵陳僉判

僉幕借賢久仰弓旌之重帥垣置屬猥陳俎豆之間不
圖小己之塵勞獲聽大邦之畫諾通名伊始奏記敢稽
恭惟某官冀北竒材斗南重望水晶宮之人物玳瑁筵
之風流志在掃清安事仲舉之室氣存高爽自卧元龍
之樓由策足於要津即馳聲於上國始棲枳棘浹溇浦
之恩波載泛芙蓉藹仰山之春色逮魯雉繼馴於桑陌

謂喬臯即觀於楓宸曷屈元僚尚臨會府意者重藩翰
賓客之選將以為臺閣公卿之儲柱笏而對西山豈容
席煖聯鑣而向北闕佇有詔溫某壯齒雖駸童心猶騃
屢困有司之辱已甘俗吏之歸始役家庭厥蓄而弗肯
獲繼叨臺幙不稼而胡取困甫沿親檄之還忽玷公車
之辟未能觴政安贊俎籌猶燕方巢幙之危廼鵲有依
枝之幸登樓作賦喜親王粲之文章吹帽貽嘲願恕孟
嘉之落拓

通江陵張教授

竊食釀營將近元戎之幙摠衣鬻序幸依夫子之牆雖
一行作吏之久荒然千里得師而何幸通名攸始修贄
敢稽恭惟某官學海回瀾詞林槁藻人物冰壺之瑩潔
聲猷金薤之琳琅筆補化工提千古文章之印圖參太
極續諸儒性理之燈自天府之墨濃已京師之紙貴盍
徑儀於芝省乃俯屈於芹宮崇雅黜浮由欲起文風之
靡受業解惑遂有資師道之隆願毋嘆鄭叵之寒決不

容孔席之煖祥鱣蜚下振鷺立登某壯齒雖駸童心猶
駢屢困有司之辱已甘俗吏之歸始役家庭厥蓄而弗
肯獲繼叨臺幙不稼而胡取困甫沿親檄之還忽玷公
車之辟未能觴政安贊帷籌雖使之從政也與其敢曰
讀書何必舞雩鼓瑟倘令俎豆於其間攻木撞鐘願與
佩紳之在列

通激賞庫方撫屬

折衝樽俎之間夙推上佐濫觴糟粕之末偶綴下陳不

圖小已之么微乃有同寅之幸會通名攸始奏記敢稽
恭惟某官學海回瀾儒林摘藻人物永壺之瑩潔聲猷
金雞之琳琅王粲文章信是劔南之獨步石洪休譽宜
為冀北之空羣自魏級之摘髭即要津之策足灘飛雙
鶴少親黃綬之勞堂集三鱣游典青衿之教珍既陳於
席上穎果露於囊中鸚渚賦詩方夜月訪庾樓之勝龍
山弔古復秋風尋嘉帽之遊自閩畫之一施即薦書之
四達安西草檄暫依綠水之盈池天祿校書佇對青藜

之照閣某齒將就壯骨未換仙屢折翅於有司已甘心
於俗吏一官漫浪厥蓄貽弗穫之羞三仕棲遲不稼有
取塵之請屬沿親檄忽玷公車未能辯五齊之名無以
贊十連之畫賴珠玉之在側庶糠粃於其間事了而以
為癡安敢拄西山之笏時復而一中聖願同對北海之
樽

代蜀總通交代蔡郎中

九重西顧蘭闈供蜀口之師萬里東歸菊徑愜吳頭之

夢既得金篦之刮膜抑資玉屑之滅瘢契托交龜喜深
賀燕恭惟臬官晏琦敏手終賈竒才步武絕人如熟路
輕車之初試規摹經國無蟠根錯節之遲留時警淮邊
公從儉幕漢烽已急不虞代馬之飲江楚炬幾焚獨脫
池魚之及火既砥中流之柱遂題半刺之輿就膺皂蓋
以擁轡兼畀繡衣而持斧鋤其荆棘屏以金湯屬劔北
之宿師勤殿西之旰食僉言公可上曰汝欽赤壁雪堂
已復坡仙之舊觀青天雲棧更看太白之昔難少遲閭

闔之清班姑舉衰斜之故智近稽唐制度支當佐於軍
興遠考周官冢宰佇兼於國用某技窮弩未興切刀頭
自供柳塞之貌貅久負尊鄉之鷗鷺瓶之罄矣弓以招
之顧聯父兄粉梓之陰乃締子孫芝蘭之好願馳遵馭
俾問蟲舟綽綽餘裕哉已度秋塞草肥之候遲遲吾行
也恐踰春江桃浪之期

通廣西經略交代董侍郎

闔節奏功絲綸趣覲上疇咨宿望屢催衮衣東下之期

公遲俟後人將授襟帶南中之略惟昔素聯於雅好乃
今獲忝於交盟爰潔緘藤往塵籤莞恭惟某官中正而
肅括公溥而明通言行見於躬行踐履之直事業得於
學術講論之素世推王佐繼春秋三策之陳名擅儒林
邁禮樂五郊之奏特表裏之一實歷中外之百為長風
孤騫砥柱屹立九陞東知之親結四方征鎮之備更衡
嶽雲開父老愛棠之未替潯江月淡兒童騎竹以載迎
陞之輦禁之邇聯佩以麟符之重寄江無飲馬淵有潛

蛟紫蓋黃旗正賴佐中興之業碧簪青帶乃煩屈外服
之遊星輶參鉞之交輝雨瘴烟蠻之盡洗屬時羣醜眈
我三陸九獸蹄之跡可通恐狼子之心叵測用費中朝
之區畫尤嚴後戶之綢繆咨爾股肱寬吾心腹爰正予
工之命未酬維屏之勞謂諸葛已定南方然後經營於
北事倘司馬歸相中國自應戒懼於邊人明公是行睿
意有屬延英晝接熟陳當世之宜文德曉宣大作吾民
之福某凋零髣雪牢落心灰不堪入市之柳榆徒爾據

鞍之矍鑠淮藩籬江門戶固嘗同管鑰之分公鐘鼎我
山林豈敢望車塵之及上恩忽被前躅猥承欣聆夙駕
於三階敢憚暑塗之百舍倘其念舊悉以告新山川輿
地之何如當盡循於成畫閭闔鈞天之此去冀加惠於
孤蹤

通京湖制置交代賈尚書

渙渥九天視儀兩地命贊皇而繼吉甫光增淮甸之前
聞舉陸遜以代呂蒙拈出荊州之遺事祇慚謏技莫紹

英猷將乘竹馬之棄餘敬卜著龜而告至恭惟某官量
包流峙響撼堪輿對在天列聖之靈精忠貫日起過江
諸賢之弱讜論生風服夏人夷人之心運軍事國事於
掌直欲倒溟渤以淨六合是宜植泰華以固四維十年
江漢之經營萬里巴渝之聲援網羅天下之士翕若雲
從給餉關中之軍懽然雷動規畫大則事事備識見遠
則著著高古社稷臣其猶劣諸令公卿間誰出右者西
塵劈箭東陝分弓紫電出匣而愈試愈新明月走盤而

一轉一活佛狸引避於瓜步戎馬渴望於新塘斬將塞
旗奏劉將軍早林之捷班師徹寨收韓宣撫木柵之功
瓊花色澤之芳鮮蘆葉聲音之響亮償先正未償之志
辨他人未辨之勲起居太夫人視江陵而增耀留相聖
天子曰端殿以登庸某賦分多竒強顏重出投身烟瘴
方藥石之相親受任風寒忽絲綸之誤寵鼓再三而已
竭規畫一而具遵豈敢叙雅好於交龜抑且觀壯圖於
騎鶴前糠粃後瓦礫公其悵若以有容左規矩右準繩

僕則守之而勿失



可齋雜藁卷六